


CELEBRACIÓN EN OS COTOS (na casa)

3 – 4 de outubro do 2020

XXVII DO TEMPO ORDINARIO



NON MÁIS
VIOLENCIA
DE XÉNERO



OS COTOS COA IGUALDADE VERDADEIRA DAS PERSOAS,
COS POBOS QUE SOFREN INJUSTIZA E ABANDONO,
COS REFUXIADOS E MARXINADOS DA SOCIEDADE,
COA NATUREZA MALTRATADA
E CON RESPONSABILIDADE PERSOAL ANTE A COVID-19



1.- ENCONTRO EN FAMILIA

SAÚDO DE BENVIDA

🎵 *Andarei na presenza do Señor*

Celebrante:

Benvidos sexamos todos a esta celebración. Reunímonos para compartir a fe en familia, e facémolo no nome do Pai e do Fillo e do Espírito Santo.

Aínda que moitas veces o pensemos, non somos donos do mundo no que vivimos. Xesús quere hoxe aclararnos que o mundo no que vivimos é a viña do Pai e nós soamente somos os labregos que traballamos nela e para El.

A nosa dedicación, os nosos esforzos teñen que dar froitos. Trátase de conseguir froitos e froitos de calidade para o dono da viña.

Na parábola os labregos queren apropiarse da viña matando o herdeiro, e non se preocuparon dos froitos.

Xesús invítanos hoxe a traballar nesta viña do Pai que é o noso mundo. Quere que a coidemos para que dea froitos bos e abundantes. Estamos dispostos?

ACTO PENITENCIAL E COMPROMISOS

Celebrante: *É o momento de dar unha resposta á invitación que nos fai Xesús de traballar na viña do Pai. Pero sabemos que moitas veces non estamos dispostos a responder á súa chamada por iso pedimos perdón.*

Monitor/a

➤ Perdón por non entender que na vida estamos chamados a dar froitos, para nós e para os demais.

Señor, dános a túa esperanza

➤ Perdón por non estar dispostos a poñernos no lugar do outro, para percorrer xuntos o camiño das ledicias e tristuras.

Cristo, dános a túa esperanza

➤ Perdón porque a pesares de que todas as persoas posuímos a mesma dignidade, aínda nos cremos uns mellores que os outros.

Señor, dános a túa esperanza

Celebrante: *Deus todopoderoso teña piedade de nós e dos que teñen lugar no noso corazón e nosa vida. A todos o Señor nos conceda o perdón e nos leve á vida eterna. Amén.*

ORACIÓN PROPIA DO DÍA

Celebrante: *Como familia presentámoslle ao Pai os nosos desexos de traballar na súa viña e pedimos que nos axude a ser bos labregos que deamos froito abundante.*

(silenzo)

Deus, noso Pai,
o teu amor é tan grande que sobrepasa os méritos e mesmo os desexos dos que che suplican.

Móstranos a túa misericordia,
perdóanos o que oprime a nosa conciencia e concédenos o que nin sequera nos atrevemos a pedir, por Xesucristo, que vive e reina por sempre eternamente. Amén.

2.- PROCLAMACIÓN DA PALABRA DE DEUS

(sentad@s)

Monitor/a: *San Paulo móstralles aos cristiáns de Filipos que teñen que confiar en Deus e non desacougar, porque así a paz de Deus estará con eles.*

Na nosa familia podemos aplicarnos os consellos que San Paulo dá a estes primeiros cristiáns e poñelos en práctica pois tamén nós queremos participar desa paz de Deus. Ou non?.

LECTURA DA CARTA AOS FILIPENSES

Irmáns e irmás:

Non desacouguedes por cousa ningunha. En todo presentádelle a Deus as vosas peticións con oracións de súplica e acción de grazas. E a paz de Deus, que supera toda intelixencia, custodiará os vosos corazóns e os vosos pensamentos en Cristo Xesús.

Do resto, meus irmáns, todo o que sexa verdadeiro, todo o que sexa serio, todo o que sexa xusto, todo o que sexa enxebre, todo o que sexa estimable, todo o que sexa honroso, calquera virtude ou mérito que haxa, iso é o que debedes estimar. O que aprendestes, recibistes, oístes e vistes en min, iso é o que tedes que levar á práctica. E o Deus da paz irá convosco.

Palabra do Señor

♪ n° 41 *Quen nos vai separar de Ti*

SALMO

(en pé) Leccionario I A páx 262 Mt 21,33-43 EVANXEO

PROCLAMACIÓN DO SANTO EVANXEO SEGUNDO MATEO

Daquela díxolle Xesús aos sumos sacerdotes e aos anciáns do pobo:

- Escoitade outra parábola:

Dunha vez había un propietario que plantou unha viña;

rodeouna dun valado, cavou nela un lagar e construíu un caseto para o garda. Logo, arrendoulla a uns viñadores e marchou para lonxe.

Cando chegou o tempo da vendima, mandou os seus criados aos viñadores, para cobrar as rendas. Pero os viñadores agardáronos, e a un zorregáronlle, a outro matárono e a outro apedrárono. De novo mandou outros criados, máis numerosos; pero tratáronos do mesmo xeito.

Por último, mandoulle o seu propio fillo, dicindo para si: "O meu fillo hano respectar". Pero os viñadores, ao veren o fillo, comentaron: "Este é o herdeiro: veña, matémolo, e a herdanza será nosa". E agarrárono, botárono fóra da viña, e matárono.

- Ben, e cando veña o señor da viña, que fará cos viñadores aqueles?

Respondéronlle:

- A eses malvados faraos morrer de mala morte, e arrendaralle a viña a outros viñadores, que lle paguen as rendas no seu tempo.

Díxolles entón Xesús:

- Seica non lestes nunca na Escritura:

A pedra que desbotaron os canteiros é agora o esquinal: esa pedra colocouna o Señor, ¡que regalía para nós!?

Por iso dígovos: quitarásevos a vós o Reino de Deus, e daráselle a un pobo que produza bos froitos.

Palabra do Señor

(sentad@s) gardamos uns instantes de silencio para acoller a palabra no corazón



Temos a responsabilidade de coidar a terra que temos nas nosas mans, pero moitas veces facémolo créndonos os donos e propietarios.

Só somos COIDADORES e non podemos facelo mal, pois as consecuencias serán para nós mesmos e para as xeracións vindeiras.

Na parábola tamén o FILLO está para coidar, aínda arriscando a vida. É o noso CRISTO.

(en pé) **PROFESIÓN DA FE**
Celebrante: Neste encontro familiar, comprometémonos a poñer os mellores feitos para coidar e dar froito nesta terra que o Pai pon nas nosas mans. Crer e facer crible é o que agora rezamos:

Creo, Señor, pero aumenta a miña fe

Monitor/a

Crede en Deus Pai e Nai,
que na vontade de amar
nos creou á súa imaxe e semellanza para coidar?

Creo, Señor, pero aumenta a miña fe

Crede en Xesús,
irmán de todos e todas,
que nos convida a compartir
dando froitos de xustiza e paz?

Creo, Señor, pero aumenta a miña fe

Crede no Espírito Santo
que alenta no corazón
para amar e compartir coma fillos de Deus?

Creo, Señor, pero aumenta a miña fe

Crede na igrexa,
familia dos homes e mulleres
que queren seguir os pasos de Xesús
testemuñando o evanxeo?

Creo, Señor, pero aumenta a miña fe

ORACIÓN UNIVERSAL

Celebrante: *Movidos pola fe, dende a nosa casa, rezamos polos homes e mulleres que se preocupan e coidan a terra, e canto hai nela. Facémolo dicindo:*

Axúdanos a dar unha man, Señor

Monitor/a

- ✓ Para que na Igrexa descubramos que os froitos da viña están na capacidade de ofrecer o amor a quen se sente so, enfermo, empobrecido ou desesperanzado, oremos
- ✓ Para que non perdamos esperanza e ilusión pola vida, aínda que ás veces a vida nos supere e nos resulte incomprendible, como nesta pandemia, oremos
- ✓ Para que sigamos coidando e facendo cribles unhas familias cristiás máis sinxelas e verdadeiras, e sempre dispostas a facer ben, oremos
- ✓ Para que as persoas que teñen a responsabilidade de gobernar, non pechen os ollos ante a traxedia na que viven os refuxiados, oremos
- ✓ Por nós, para que nesta viña de pandemia sexamos responsables e coherentes coa nosa fe dando exemplo para o coidado de todo e todos, oremos

Celebrante: *Grazas Señor porque sabemos que sempre acolles as nosas preocupacións e desexos se chos pedimos con fe a Ti que vives e reinas por sempre eternamente. Amén.*

3.- OS SIGNOS DA COMUÑÓN CON DEUS EN FAMILIA

NOSO PAI

Celebrante: *Ao Deus dono da viña, que confía en nós e espera a nosa colleita, rezámoslle dicindo:*

NOSO PAI ...

SIGNO DA PAZ

Celebrante: *Confiemos en Deus e non desacougemos, como aconsella San Paulo, e así a paz de Deus estará preto de nós e poderemos compartila con todos.*

NON COMULGAMOS PERO ESTAMOS EN COMUÑÓN

Celebrante: *Compartimos hoxe a fe, como os labregos despois do traballo, para retomar forzas e poder volver a conseguir novos froitos. Xesús reparte o pan e dános ánimos e forzas para non desacougar.*

Ditosos nós que hoxe fomos chamados a traballar na viña do Pai para facer realidade o seu Reino na terra.

 **Na tardiña baixa da vida**

4.- AVISOS E DESPEDIDA

ORACIÓN FINAL

Celebrante:

Oremos:

Señor, acompaña coa túa protección constante á familia que renovaches na fe compartida coma comunidade.

Ti, que nunca deixaches de nos axudar, fainos merecentes da salvación eterna.

Ti que vives e reinas con nós por sempre eternamente. Amén.

Con Xesús queremos ser unha familia na que confiar para o coidado da terra e da natureza.

Con Xesús queremos ter un trato xusto e digno cos demais procurando sempre unhas relacións humanas baseadas na igualdade e no respecto.

Que a celebración que agora rematamos nos dea azos para vivir na coherencia de dar froitos para a loita contra a COVID-19, como nos convidou Xesús na parábola do evanxeo de hoxe.

Que teñamos un bo día, unha boa semana, e o Señor nos bendiga, † nos garde de todo mal e nos leve ao seu fogar de vida eterna. Amén.



**“Coidar a viña do mundo,
e dar froitos de ben
é o que se espera de nós”**

Intuímolos na parábola de Xesús do evanxeo de hoxe.